

四庫全書

集部

欽定四庫全書

集部
龜巢稿卷七

詳校官監察御史臣劉湄

中書臣劉源溥履勛

總校官知縣臣楊懋珩

校對官主事臣陳文樞

謄錄監生臣張元愷

欽定四庫全書

龜巢稿卷七

元 謝應芳 撰

啟

訟伯父墳地上縣宰啟

掩骼埋胔者古今之制其仁如天過家上冢者子孫之情伊誰無地顧邱壟之失所實風化之有傷瀝血寸丹陳情尺素切念某痛懷伯父曩歷兵戈死雖正狐首之邱時未集鴻飛之澤啟手啟足幸能四體之全歸若斧

若堂詎信百年之難保蓋自陵谷變遷之后以致家門
摧敗之餘失此故塋屬諸姻黨誰其主者展我甥兮此
一錯在乎當時故陸沉至于今日渭陽之舅絕無見念
于秦龜陰之田那復肯歸於魯然豈料人面獸心之輩
乃謀為兔葵燕麥之場雷厲風飛宰木頓空于斤斧日
侵月削佳城亦壞於犁鋤殆將見暴骨之寒竟何異鞭屍
之慘三尺之法不畏匹夫之勇莫當向來不平之鳴屢
致逢彼之怒鬪狠不顧輕性命于鴻毛匍匐而歸飽尊

拳於雞肋是可忍孰不可忍如之何未如之何徒增萬
里之悲每動窮途之哭既無面於江東父老復何顏於
地下祖宗日月不照之盆弗堪長覆天水違行之訟可
憚終凶賴典章有禁地之條其情理實滔天之罪仰惟
公道俯察愚衷恭惟某官讀萬卷書為百里宰冰其清
玉其白絃之直稱之平寬猛適中剛柔相濟數月有撫
字征科之績四郊無叫囂墮突之憂休休焉其有容皜
皜乎不可尚聲蜚臺閣恩迓絲綸如某者受廬為氓閉

門歛跡亦久被卓魯之化焉敢興虞芮之爭但悲夫九
泉之人欲掩以一坏之土願施善政垂戒惡人使知見
舅如母之親勿為敗俗亂常之事復此牛眠之地仍為
馬鬣之封想去家舊鶴重歸看銜土慈烏畢集凡春秋
拜掃之日皆存亡感激之時上窮碧落下黃泉為雪幽
冥之恥生當隕首死結草弗忘判斷之恩痛切之私敷
宣罔既

上千尚書啟

公名傳字受道號止
坐延祐乙卯科進士

不封萬戶侯願識韓荊州常切慕謫仙之志手把一封
書上有皇甫字輒敢扣昌黎之門問胡為今日之來曰
專為古人之事與其進也適我願今嘗謂傳道不絕者
先民之功沒世不忘者後人之義若道鄉鄒忠公之葬
近在城陰有了翁陳先生之銘流傳天下孰謂此一邱
之土盡廢于八世之孫鄉隣忍于瓜分翁仲隨以蕪沒
故諸生為之太息于當路鳴其不平賴二侯以公道主
盟不半載而佳城復舊築思亭而薦蘋藻立華表以樹

松楸苟非紀載之詳尚慮耕鋤之患立羊公一片石欲
大書名世之言如季子十字碑以昭示尊賢之意雖不
咎于既往庶有補于將來求之與之完矣美矣恭惟某
官老成前輩文章鉅公三千字禮樂縱橫在早歲修名
揭日九萬里扶搖直上至晚年直氣凌秋典文衡則妙
于稱停秉史筆則嚴于褒貶烟霞一壑今歸老于長洲
茂苑之間霖雨八荒將拜命于安車蒲輪之召斯言非
佞與望所期某曩客新安聞公舊政復紫陽之闕里大

振儒風勒黃絹之好辭有光吾道諒弗忘于素志必重
念于斯文惟大賢無不容則小子乃有造于以紀前言往
行于以發潛德幽光眷言梓里之間永若桐鄉之愛鏘如韶
鈞蔚如虎豹雄文照耀于九京明則禮樂幽則鬼神妙
理昭彰于千古存亡有感敷叙莫殫

贊見余用中先生求作辨惑編序啟

狂簡斐成章辨諸家之邪說品題作佳士必當代之儒
宗夫辨香敬為南豐蓋學者仰如北斗予其進也適我

願兮嘗謂璞玉雖奇非和氏則山中之石琴材固美無
中郎則爨下之灰太玄經有覆瓿之譏公羊傳有賣餅
之辱古猶如此今豈不然欲立言圖不朽之傳必取正
于有道之士嗟今陋俗舍正路而弗由集古遺言迴狂
瀾于既倒可奈一齊而衆楚猶如皆醉而獨醒驚人之
鳥一鳴怪雪之犬羣吠願君斲堊為我折衷或袞袞一
字之榮則價倍千金之重馮豐隆寄寥廓久矣馳情扶
雲漢分天章豈辭揮手網維吾道黼黻斯文茲蓋伏遇

某官文章鉅公典刑前輩詞場較藝視五色之日不迷
鄉國興賢使三代之風復振躬行古道歷踐華途每為
政郡邑之間常蜚英臺閣之上歸從彭澤舊家環北固
江山教若河汾大隱居南徐城市戶外之屨常滿門前
之轍何多雖云遂菟裘之營必復有蒲輪之召如某者
俯慚後進仰慕先知尊其所聞行其所知愧未造高明
正大之域博我以文約我以禮誓弗忘仰鑽瞻忽之誠
景慕有餘編摩罔既

贊見李晉仲提舉求安啟

思忠公傳道之賢為褒遺事辨邪說誣民之惑乃集前言持布鼓于雷門分天章于雲漢恭惟某官儒林麟角學海龍門鍾山草堂之英靈雪竹霜松之標致懶折腰于彭澤早賦歸來聊濯足于滄浪亦云自取皜皜乎不可尚已休休乎其有容焉然吾道賴以綱維而儒林視為儀表尚持藻鑑以主文衡名動京師栢府之薦章交上官居翰苑蒲輪之召命將臨先生自此升學者仰如斗

某吳中晚進白下漫遊自憐如明月暗投誰復念陽春

寡和汲汲有登龍之願拳拳慕倚馬之文方往依劉以

圖御李

欲因劉克輔見公乃于劉處偶得識面

低頭拜東野適因邂逅之

間瓣香為南豐得展殷勤之敬敢持兩帙謹用三熏長
年坐井底觀天此日詣門前立雪倘賜五行之覽必蒙
一字之褒登山采玉入海求珠捆載乃酬其素志製芟
為衣紉蘭為佩激昂正賴其清風

贊見楊廉夫提舉求序思賢錄啟

兩袖春風作洛下書生之咏滿舡明月過關西夫子之
門問胡為今日之來曰端為古人之事切有請也能無
從乎伏念某生延陵季子之邦頗知禮讓復道鄉鄒公
之墓當效馳驅樂民俗之還淳喜士風之近古思賢有
錄味道無厭紀前言往行之二三發潛德幽光之萬一
自藏燕石誰售雞林恐公羊遭賣餅之譏使太元有覆
醬之辱願借春秋之筆稍為月旦之評得一序以冠塵編
若干金而加敝帚庶傳不朽有補將來非惟先哲之有

光真乃後學之多幸茲蓋伏遇某官乾坤清氣風雲壯
懷走馬看長安花早歲似唐人得意割雞為武城宰居
官如言子愛人以文章政事之俱優宜天下國家之大
用尚淹滯庫未展經綸人皆知大器晚成我乃獲景星
快覩題鸚鵡賦已多年傳麗則遺音到鳳凰池將不日
遂平生高志倚期瓜代入覲楓宸如某者敢不長遡下
風永懷高誼聞所聞見所見真如到神仙十二樓之間
步亦步趨亦趨或可在弟子三千人之列其諸欣慕罔旣

敷宣

贊見張用鼎教授啟

黃魯直謁蘇東坡因述依松之志禰正平過孔北海乃
蒙薦鶚之辭蓋同氣以相求必當仁而不讓敢持尺牘
特造丈函恭惟某官海內儒宗江西詩派往歲為馬尚
書賓客當時有虞學士品題謂鵬程萬里橫飛期鳳池
十年可到道出羲皇才過屈宋何鄭公猶在於廣文上
規姚姒下逮莊騷若韓子獨尋于墜緒先覺覺後已立

立人四方之學者來歸一鼓而斯文作氣博求地利開
元武湖以廣澤物之功善育人才置治事齋而兼水利
之意聲蜚臺閣恩迓絲綸如某者生長吳中棲遲白下
顧窮居而獨善恐沒世以無聞著辨惑編闢近世之異
端邪說作思賢錄發前修之潛德幽光欲煩斲人之
斤輒敢弄班門之斧平居抱膝仰泰山北斗之高此日
承顏覩鳳凰景星之快天其或者道之行與得華袞一
字之褒增敝帚千金之價品題作佳士何慚奏白雪遺

音吹噓上青冥或可借春風餘力

答陳天倪謝薦師啟

見賢而舉者古先之訓惡敢言功易子而教者夙昔之心幸逢知己豈意予互鄉之進亦勞賦小山之招恩斯勤斯至矣盡矣恭惟容齋先生元元衆妙休休有容身雖領袖宗門學則淵源吾道小樓明月勝元龍百尺之豪高枕白雲待丹鳳九重之詔有前人風烈為後學範模如某者與緇黃交能青白眼獨喜子墨名儒行非他

人羊質虎皮通家踰三十年責善難一二計茲荷愛烏
之及特厯遺鯉之書曲憐覓梨栗之兒直命入芝蘭之
室從明復受春秋之業看希夷畫太極之圖熊魚何幸
乎兼得犬馬當知其所報道院迎仙書堂隱相增爽氣
于西山鄰家乞火曉窓分燈藹餘光于東壁銘心有感
筆舌奚殫

謝監察御史火公舉茂異啟

天朝重耳目之官實居清要風憲擢山林之士非市私

恩蓋竹頭木屑有可用之時而茅拔茹連乃必然之理
敢因竒遇庸布謝言切念某家本吳中客茲江左以芟
荷為衣秋蘭為佩訪鍾山之英草堂之靈作山川司馬
壯遊負湖海元龍豪氣自憐骭胝誰問飄零瞻烏蒼柏
之間歌鳳古臺之下幸逢駟馬蒙試雕蟲叩大小從容
之鳴以盡其聲收輪囷離竒之材而斲為器使李白立階
前地如毛遂脫囊中錐得之若驚觀者如堵茲蓋伏遇
某官身居臺閣腹蘊詩書凜凜乎動搖山岳之威惓惓

乎樂育菁莪之意植公門之桃李蓄相籠之侵苓昔中
州草木知名今南國芝蘭俱化三省十道俱聞鐵面之
威一日九遷將拜玉音之召風塵一掃霖雨八荒如某
者敢不恒念品題益加修省行日用常行之道讀平生
未讀之書雖蒲柳之質望秋先零而薑桂之性到老愈
辣惴惴焉出門下誓弗忘一瓣之香耿耿者在胸中當
自愛千金之帚其諸感佩罔既敷宣

代羽士上廉訪僉事啟

上士無爭奉先師之明訓監主自盜奈公論之難容故
鳴鼓而攻之若同室而鬪者切念某為李老君弟子住
焦真人道場小小山林設住持之主席區區金帛有交
代之成規比因搏節年多致有羨餘日積被前職鼠偷
狗竊使空山鶴怨猿驚當市攫金衆所共見匹夫懷璧
罪實難逃已嘗赴愬于有司且復諫詞于教所始則強
項不屈終乃搖尾乞憐遂以當仁不讓之心聽其用和
為貴之說乃償薄產以補亡金未幾背歛血之盟又復

為紆臂之奪用朝三暮四之術專務貪婪逞人一己百
之能肆為欺罔楚弓得失秦鏡咨度勞六轡之驅馳廉
法廉辨廉善廉能按百官之能否明月靡遺罅隙清風
一掃塵埃睠茲寂寞之濱亦在照臨之下豺狼斂跡草
木知名激濁揚清既憲綱之振肅舉直錯枉宜公道之
昭彰或移北山之文或賜南山之判戒無厭溪壑之欲
征悖入府庫之財庶有補于焚修更無煩于訟牒思之
弗措辨之弗措願亟持全璧之歸得之若驚失之若驚

當永守青壇之物

謝崑梅州判舉鄉善啟

求儒雅闡大猷漢室之興復見經品題作佳士荊州之
識為榮矧蒙下采于菲葑豈作不言之桃李寸丹有感
尺素具陳某官佐理神州賢勞王事虛心待物明于滄
海之珠美德含輝粹若崑崗之玉有賢守與承流宣化
在寮窠則同寅協恭切切斯民惓惓吾道冰霜並潔風
月平分南山之判不移北闕之心長戀二千石不如逢

掖下士尤勤九萬里直上扶搖前程甚遠吾言非佞與
望所期某久客東吳遠逃兵燹功名蹭蹬昔為上竹之
鮎身世飄零今作無枝之鵲偶爾宿贊公土室儼然逮
梅仙市門希高山流水以知音驚明月夜光之投暗說項
不輟薦禰有書駕言采泮水之芹何異繼稟人之粟驥
千里未甘伏櫪鳥一鳴或可驚人翱翔道義之林涵咏
詩書之澤鄉之善士國之善士尚期自下以升高知惟
春秋罪惟春秋勿謂有名而無實

賀陶教授啟

鄭廣文才過屈宋坐一壇而司業相憐胡安定教授蘇湖置二齋而太學為法升高自下振古如茲恭惟某官前輩典刑後學模楷于以傳道授業而解惑信乎溫故知新而可為五柳莊前自昔存舊家之菊片玉山下只今樂泮水之芹振木鐸之遺音續杏壇之雅曲先覺覺後聿成陶鑄之功已立立人正賴提撕之力自此升矣式我願兮如某者白首流離青雲蹭蹬遇州倅舉一鄉

之善以野夫寘多士之間愧風鷁之退飛喜星鳳之快
覩先生富道德致吳興弟子之多才雜說為爬梳正學
校諸生之狂簡

代上馬都事啟

騏伏櫪負千里之志久倦驅馳鳥在阜作三年之鳴猶
能奮躍未趨幕府敢借箸籌某官胸襟貯萬卷書文章
揮五色筆頻年花縣絃歌之化大行今日徽垣贊畫之
才方展王公大人以青眼相顧縉紳先生以白眉見稱

茲泛綠以依紅將腰金而曳紫一節旣全其清白深憂當
念乎羣黎願為龍伯高勿效杜季良恪守祖傳之家法
近舍皇甫湜遠取白居易當求世用之人才政予望之
自此升矣某遠逃兵燹久客句吳秋菊寒泉祠甫里見
尊賢之義長洲茂苑頌鄉校輿人之言已曾和白雪
之詞但木覩景星之快由村落每來城府知軍民多困
飢寒敢用條陳以效芹獻于以開難發之口于以推不
忍之心區區非釣于虛名懇懇必求其實效蒼生顛厓

受辛苦隔羣仙天上清高大比廣廈俱歡顏願比屋眼前突兀

代謝沈太守啟

一輪明月清輝今照蘇州萬里長風素志乃如宗慤念
先人之遺澤挈孤子于長途知幸自天感恩無地恭惟
某官乾坤清氣風雲壯懷既不忘向日之誠且深識隨
時之義往年烏府冠莪鹿角之威此日黃堂庭茂鼠牙
之訟退食則斑衣以娛父母傳家則黃卷以授兒孫鞭

不施蒲莊先種柳愷悌咸稱名杜勲名必到蕭曹三江
五湖之風謠政聲藹藹四海八荒之霖雨輿望懸懸遺愛
甘棠流芳汗竹如某者仰依公庇勉讀父書既已承薦
鶚之章當不負愛烏之及脩復苓于藥籠作桃李于公
門庶竭駑材以圖豹變父為大丈夫子為士賴提携發軔
之初車如流水馬如龍願追逐後塵之末其為報効罔
既敷宣

上沈太守啟

太叔為鄭大夫始從寬而終猛不疑謁暴公子先言威
而後恩惟大海不擇細流庶他山可以攻玉請以田夫
野老之語陳於大人君子之前切以某近寓吳江昨經荒
浦聞近日有鼠竊狗偷之輩在各都如蜂屯蟻聚之多
始則穿窬終為強禦忽忽乎神出鬼沒累累然晝伏夜
行星月光中窺商賈他鄉之客烟波深處伺妻孥逃難
之人或如斫嚴顏之頭或若斷孤兒之臂橫屍洲渚流
血泥沙遺臭熏天銜哀入地掩鼻而過者多矣垂泣而

道者誰與鄉隣懼而不言州縣置之不問致令滋蔓轉肆兇頑目之所覩者如此其多耳之未聞者尤為不少新鬼煩冤舊鬼哭痛恨難忘他生未卜此生休衷情誰訴惟當路發神明之政為斯民雪冥漠之冤三尺法申明舊章五色棒掃除羣醜寬猛相濟不勞用崔澤之兵恩威並行何待持繡衣之斧一雷既震百蟄皆驚恭惟某官俊傑識時精忠貫日清冰出萬壑此往年烏府威聲明月照蘇州乃今日虎丘嘉話甘棠樹聽召南之訟

老萊衣照堂上之親愛民若拙于征科下士能勤于吐
握五花馬金章紫綬方被殊恩六柳莊綠水青山未容
高興政須治最以候登庸如某者幸獲承顏甚慚饒舌
聞而來見而去仰山斗之彌高道以政齊以刑看民風
之丕變

上梅知州陸同知啟

稂莠不除必有傷于嘉穀盜賊不息寧無害于良民目
前事可為寒心林下人敢云饒舌俯慚卑陋上瀆高明

切以某為客松陵艤舟荒浦聞近日有鼠竊狗偷之輩在
各鄉如蜂屯蟻聚之多或穿墉以踰垣或發匱以祛篋或
牽去春耕之犢或移人夜泊之舟或劫行商囊橐為之
席捲或因逃難妻孥與之偕亡或如斫嚴顏之頭或若
斷孤兒之臂慘星月見遭毒手渺烟波逸去克身濺血
孤蒲伏屍洲渚漂流于五都十都之境臭腐于六月七
月之時里正不敢言恐煩檢覆鄉隣寂無語懼有干連
致使跳梁轉加延蔓天陰雨濕但聞冤鬼之聲水遠山

長渾是愁人之境惡貫既滿禁網難逃今有司獲盜竊之徒宜因事究凶強之黨幸毋姑息亟賜施行轟雷霆于掩耳之先照日月于覆盆之下追三窟兔須旁求曲徑之踪殺兩頭蛇方能免後人之患餘罪戾之輕者加徒役而遠焉庶令涇渭殊流不使薰蕕同器蓋治此非常之盜必加以非常之刑雪痛怨于黃泉聽歌謠于綠野恭惟某官某官同心同德無黨無偏各守一廉冰其清而玉其白咸稱二美絃之直而鏡之明閭閻蒙撫宇

之恩案牘絕煩苛之弊訟庭如水印匣生塵明月清風
暫爾居淞江太湖之上高牙大纛翩然到鸞臺鳳閣之
間人皆仰之自此升矣如某者言雖僭越事實昭彰祇
緣以兔死狐悲未免較鶴長鳬短溺猶已溺望明公擴
仁愛之心刑期無刑變惡黨為淳良之俗幽明有感贊
美奚殫

代上江浙丞相求蔭叙啟

上書伏光範門韓愈以布衣自進斗酒酌新豐市馬周

于逆旅誰知仰止三台素非一日惟吐哺握髮以下士
敢披肝瀝膽以陳情切念某生毘陵錫谷之墟客吳郡
長洲之蒔早年勤苦頗讀父書連歲孤哀且罹兵燹竄
妻孥于荊棘揮涕泗于蓼莪學弓為箕學治為裘尚賴
傳家之業在無父何怙無母何恃孰憐遊子之歸遲望
西日於長安歎南風之不競鬱鬱居此遑遑何之芟為
衣容為裳忍飢忘溝壑之憂

開

弟慚沒世而無聞有負先人之遺澤欲求蔭叙

願借恩光雖云匪麟角鳳背之奇亦庶幾竹頭木屑之
用持衡留藻鑑大書適降于九重隨水上龍門桃浪可
乘于三級鯤鯨變化鴻鷺翱翔茲蓋伏遇某官簡在帝
心股肱王室保江浙數州之地障東南半壁之天以和
靜鎮國家量同文靖有忠勲塞天地爵比汾陽公門之桃
李欣榮樂籠之參苓並蓄五風十雨頻年見陰陽調燮
之功寸地尺天指日復疆里廣輪之舊恩加衮烏銘在
鼎彛如某者幸獲瞻依宜蒙拔擢大木為杗細木為桷

良工得國用之宜南山有臺北山有萊君子致太平之
樂永言報効盡力驅馳

賀上海石縣尹啟

郎官應列宿方照臨滄海之秋鴻毛遇順風乃奮起青
雲之日敬陳賀語兼進忠言嘗觀時有盛衰道無今古
為國者必以人民為本有司者必以父母為心擾攘雖
值于難時撫治合由于古道簡編所載槩獲具存曰既
庶既富而教之曰足食足兵而信矣曰孝弟可以盡堯

舜之道曰忠信可以撻秦楚之兵惟教道能結其心斯奮發以盡其力小而一邑大而九州是道為農桑學校之原其事乃錢穀甲兵之屬苟一日而必葺庶三年而有成倘不鄙常談老生斯可謂知言君子某官心存愷悌氣稟高明先世稱萬石君其道義傳家之久今官為百里宰蓋功名發軔之初以胸中所蘊之詩書為目下可行之政事征科不廢撫字尤勤仁風藹田野如春民無愁歎明月照閭閻似水吏絕喧囂釜魚之聲譽已聞

堂鱣之禎祥必應行書上考竚見高遷某幸辱故知喜
聞新政彼客燕皆能賀履豈窮猿獨不投林東入海西
去秦擬欲依棲于贊老昔無襦今有袴願同歌詠于吳
儂

諸士友陳言陸同知誣枉事啟

排難解紛竊慕古人之高義舉直錯枉宜蒙當道之至
公芻蕘有言非封可采切見吳江州同知陸某職居佐
貳政出循良三載守官一廉如水自許以赤心報國人

皆知洗手奉公不聽誅求因結仇于軍帥不隨偏黨或見忌于官僚豈意權豪乃加排陷以兵戍千有司之政以文移行無妄之灾舛一夫病死身屍勒其子巧生詞訟集衆擁停屍之地環若重圍當官逼作之人傷皆誣驗強梁若此毒害顯然越官職以橫行違憲章而不顧各州縣聞之而喪胆諸士民覩此以寒心赫然恣逞其凶威甚矣有傷于治體是可忍也尚何言哉仰惟上相之賢明俯察本官之冤枉照覆盆之日月即見昭彰遏

平地之風波毋令陷溺如某等與本官初無私愛且隔
隣封聞一州有賴其主張知百姓多蒙其恩惠昔頌德
于三江五湖之上今稱冤于萬口一辭之間其言至公
而無私所願抑強而扶弱直為壯曲為老當明曲直之
情危而持顛而扶庶免顛危之辱宜加采擇特賜施行
上量田徐孟二公啟

立國以經界為先當盡革其中之弊生民以耕稼為本
方能供在上之需惟任用之得人乃公勤而稱職欲陳

梗槩敢效芹誠嘗謂朝廷革命之初才俊為時而出凡所以體國經野皆可以忠君愛民况皇家付尺度之公要農畝定租庸之法甲是乙非者固當分辨鶴長鳬短者尤宜折衷為前代除毒歛之蛇免後人為涸轍之鮒此當務之為急其任非輕但至公而無私所行必達某官同心同德無黨無偏志如百鍊之鋼不為繞指事若重調之瑟能用改絃雖寸田尺宅皆入版圖而賸水殘山猶蒙紀錄田野既揚其聲譽銓衡必錄其勤勞同升

諸公一臺二妙某生本常郡寓此吳鄉如去邠而居岐
敢因徐而見孟願求荒圃學為老農春雨一犁駕烏犍
而東作青雲萬里看黃鵠之雙飛

上王知府啟

玉門關兩髻秋風歸來晚景金斗城一輪明月喜把清
輝人皆作來暮之歌我欲快爭先之覩騎竹失隨于童
子杖藜敢謁于大人既獲披雲亦言獻曝嘗謂農桑者
民生衣食之本學校者國家風化之原其在有司亶為

急務睹此常郡即古延陵二十年兵革以來數百里人
烟欲絕犁鋤不作絃誦無聞大田皆變為荆榛泮宮亦
燬為瓦礫今天下全歸于大統而郡中方集其遺氓如
谷寒而鄒律重噓若絃斷而麟膠再續農何以勸惟恤
民則民乃力農學何以興惟重士則士皆志學嚴一鼓
以作氣必三年而有成田野辟而賦稅增教化行而習
俗美上以副聖天子明詔之意下以著賢邦侯善治之
功斯文黼黻于皇猷舉世甄陶于清化渤海郡勸農龔

遂復見于今成都府興學文翁罔專于昔苟二端之並
舉則百廢之俱興幸無謂老生常談真可與古人同傳
某官三槐世胄五馬恩榮金莖露之澄清玉壺冰之潔
白有民人有社稷雅稱宏才為保障為繭絲會能兼美
飽夙學於胸次急先務于目前報主赤心待士青眼吐
握行周公之禮謙德彌光循良希漢吏之賢芳名不朽
如某者幸然歸魯得此依劉三十年辛勤有廬勉欲訓
城南之子千萬間突兀廣厦願蒙庇天下之寒頌禱有

餘數宣罔既

謝孫大雅惠詩文啟

寄杜甫題草堂舉世誦高公之句送李愿歸盤谷至今
傳韓子之文蓋詞章誠有可嘉則名譽皆為不朽感承
傑作敬叙謝言某生長延陵本同鄉土僑居吳郡俱避
風塵既聲跡之相聞且音問之不絕千萬人之前常曾
說項十五年之內惟欠識荆嘗結巢為蓮葉之龜來詩
甚美至還家若華表之鶴得序尤榮顧余生非李杜之

儔眎所作乃高韓之比陽春寡和明月暗投巾箱謹于
珍藏斐几時乎圭復想風采于氛埃之外見肺肝於文
字之間投桃報瓊茲抒情于尺素如葭倚玉別請教於
丈函某官以申浦之澄清鍾于安稟以君山之蒼古發
于文章驅馳莊騷出入佛老鳴教鐸中吳者久投朝簪
東海之濱枕流漱石而有祖風弄月吟風而忘世慮山
中歷日閱黃楊厄閏之年天上春風待紅杏倚雲之日
如某者素慚孤陋雅愛交遊味六經如嗜膏粱親三益

便成膠漆江東暮雲之酒願與論文山陰雪夜之舟尚
期乘興雷門持鼓郢匠揮斤

謝張雲門作詩序啟

名紳字士行
齊郡人

魯直獻東坡二詩蓋欲見瞻依之志士安敘左冲三賦
方能無非議之辭蓋當世之鴻儒乃後學之龜鑑寸丹
方感尺素具陳伏念某田野草茅山林樗櫟不揣鉛刀
之鈍常持鐵硯之堅鮎上竹竿往歲之功名可笑龜巢
蓮葉近年之身世如浮八九家寂寞江村三千丈蕭騷

白髮出言爛熟作事迂踈寤疑辨惑以成編懷古思賢
而有錄頽然詩癖忘乃途窮時抱膝為梁甫吟或掩鼻
作洛生詠對明月清風而思元度蘊高山流水以待鍾
期持鼓雷門探珠驪頷得警策片言而為辛豈春容大
篇之敢望珠璧暗投璫瑶匪報不識面而知肺腑可謂
神交如寫容而見精神珍藏手蹟披雲未遂仰斗彌高
恭惟某官四海儒宗一門科第為時而出不勝烏鳥之
情謝病而歸非為鱸魚之美以東吳之山水為西漢之

文章託古意于焦桐播遺芳于叢桂風月襟懷江湖性
氣本磊落之奇才烟霞痼疾泉石膏肓享優游之清福
道則高矣人皆仰之如某者敢不佩服斯文勉旃爾力
敝甚千金之帚榮哉一字之褒廢繩墨不為拙工灼見
用春秋之筆經品題便作佳士惟恐孤月旦之評瞻望
依依臨書草草

擬與金壇縣告索尹氏寄書啟

賣金買書自是平生之志刻舟求劍難忘眷戀之情雖

吳霜已白其頭顱惟秦鏡能明其肝胆敬持尺素用寫
寸丹切念某避地曩年泛湖連日移舟至尹干橋下依
乃姻家藏書如孔氏壁中局諸典室物宜多矣人皆見
之十三年賤跡飄蓬數百卷常懷汗竹豈知瓜葛乃變
薰猶以諸史之青編易兩牽之黃犢餘存簡牘悉入巾
箱屢云還合浦之珠竟不返連城之璧朝經暮史欲重
對于聖賢甲是乙非合辨明于官府是可忍孰不可忍
求之與抑與之與惟當道之至公庶斯文之不墜聽其

言也適我願兮某官承恩九重出宰百里廼冰其清
廼玉其白如絃之直如鏡之明以識時俊傑之才了積
年繁劇之事戴星出入雙鳧暫止于金沙搏風扶搖孤
鳳必巢于阿閣某遠來隣邑如倚太山鶴溪水天影涵
秋比琴堂之清澈米家船虹光映日載書簾以還歸

擬謝常州府官啟

曾參以同姓殺人其母嘗投杼而走黔易非在家遭疾
厥子乃驚心而歸奈何事出于隣封馴致弊生于本邑

幸大府能為辨析今微言合用敷陳切念某乙老窮居若
守株于橫峴丁男遠出因負米于荆溪疊疊乎縣帖拘追
纍纍乎里人被執爰自三月三修禊之日皂隸登門遂令
八十八老耄之年倉皇赴縣換名字如雲翻雨覆動文
移則雷厲風飛陷穽欲成網羅交設南阮貧北阮富姓
雖同而產業不同東家智西家愚人有異而鄉閭亦異
故奔訴甘棠之下蒙戒懲刻木之徒號咷徹乎二天枉
屈為之一雪伏遇某官等同宣聖化並著仁聲召父杜

母之慈祥春濡雨露礬弟梅兄之清白月映冰霜閭閻
嚮擊壤之歌城郭寢抱闕之析行書上考佇俟高遷如
某者父子知恩鄉隣感德覆蕉藏鹿本無夢于前時緣
木求魚免受灾于後日報當銜結力効驅馳

上周縣尹請祭顧將軍啟

孔北海表鄭公鄉人皆起敬文潞公題明道墓學者知
歸蓋追敬于儒先實有裨于風化敢持尺牘用徹琴堂
某老不趨時心猶好古覽中吳之勝槩訪前代之名賢

笠澤西頭皇天蕩烟波相接封門東畔顧將軍邱壠猶
存叢祠倚馬鬣之封荒鮮沒龜趺之石每經此地常念
斯人生為吳相之孫死有元公之謚華亭二陸初齊名
得三俊之稱白羽一麾獨仗義平六州之亂晉史備書
其勲業吳儂尚保其祠塋但每歲之烝嘗欠有司之籩
豆不揣效豐干饒舌敢云煩陶令折腰頻繫矢薦于鬼
神桑梓愈加其恭敬此非違道以干譽幸不以人而廢
言恭惟某官以董賈之才為卓魯之政乃冰其清乃玉

其白如絃之直如鏡之明見義勇為當仁不讓有民人
有社稷國家委任之隆教禮樂教詩書流化承宣之急
行書上考竚見高遷某飄泊長洲蕭條短褐投老二天
之下知名兩月之間其言至公而無私其事似緩而實
急生芻一束其人如玉望喬仙雙舄之鳬寒鴉數點流
水孤村弔華表千年之鶴

千陳敬初先生作懷古錄序啟

懷賢千古聊綴緝夫前言借重一辭庶流傳於後世切

有請也能無從乎睠我楚狂久客吳下過鳳凰山顧彥
先之墓有感而傷情傾鸚鵡杯李太白之詩長歌而擊
節甚矣疾黨猶同器忍乎隨桃李不言豆籩既請于有
司丹青乃新其遺廟屏除妖塚祭掃佳城搢紳皆為之
詠歌樵牧則嚴于禁約載噓藜藿用寫蒲編于以發幽
潛之光予以紀廢興之事過雷門持布鼓敢曳長裾扶
雲漢分天章煩揮健筆某居玉堂之署人慕登瀛紬石
室之書自當名世為士林冠冕演王國絲綸目短曹劉

汗流籍湜大鵬九萬里方當直上之秋黃河三千年會
見重清之日前程遠大吾道光榮某不揣迂疎尚希題
品書八篇因窮而著初不效于古人賦三都得叙而傳
尚有望于今日

代上饒叅政啟

叔向知駸蔑因聞堂下之言毛遂從平原乃脫囊中之
穎既古人有如此者豈今日獨不然乎切念某幼讀父
書從遊都邑聞所聞見所見園先生長者之鈞陶步亦

步趨亦趨習王公大人之規矩辭親日下捧檄浙東干
戈擾攘者閱五六年鞍馬驅馳者知幾千里及區區益
升斗之祿又紛紛服州縣之勞栖枳棘于慈溪望蓬萊
于滄海既失怙恃遂用來歸兄弟飄零狀若喪家之狗
功名蹭蹬誰憐失水之魚然此膝不屈于常人而其志
敢忘于斯世家徒四壁壯氣橫秋但知讀書以聖賢為
師未嘗出門與俗流為伍高山流水賴有知音明月夜
光忍令投暗鷺鷥之書既作鯢鵬之化何疑惟大匠無

可弃之才宜小草有相依之志復苓藥籠桃李公門恭
惟某官俊傑識時耿介拔俗隴雲可悅已嘗似山中宰
相之閒仁風載揚今復慰天下蒼生之望胄次炯玉壺
氷露文章垂金薤琳琅借箸而籌入則告嘉謀于公府
累茵而坐出則叅大政于薇垣已立立人先覺覺後行吾
道于干戈之際救斯民于塗炭之中幾千仞廬山者衆
人所仰五百年名世者非公而誰如某者慕蘭許年依
劉今日襪線之才雖短菲葑之采不遺朝取一人暮取

一人莫非荷提撕之力待以國士報以國士當不忘感激之情輕瀆崇嚴重加悚息

上張太尉啟

蘇轍上韓太尉書所願觀賢人光耀馬周寓常中郎館即能以時務條陳不揣下愚敢希前輩敬以惜軍愛民之事陳於王公大人之前聞斯行之時則美矣嘗謂有民有社須當畫策以治安足食足兵乃可運籌而征討準今酌古發政施仁苟欲展心上之經綸尤先察目前之

利病勿求近效宜作遠圖開荒田則為富國之原設屯田則為守邊之計除民瘼則免誅求之苦積軍儲則無匱乏之憂廣鹽權之法則遠近流通恤軍士之家則存亡感激凡茲六事盡在一時日月雖明固難照覆盆之地風雨不動願蒙庇廣廈之天布以新條革除舊弊惟其愛民如子必不以人廢言詢我芻蕘教人稼穡易其田薄其稅民力方紓居有倉行有糧兵威自振幸無吝一舉手一舉足之力更勿辭三握髮三吐哺之勤庶士

夫得進其忠言而軍民免令其失所恭惟太尉相君英
雄蓋世度量容舟以崧高維岳之英靈為海納百川之
襟度興利除害更張漢瑟之絃革故鼎新重作禹書之
貢西鄙之烟塵去遠東吳之風俗還淳見諸生如見大
賓保斯民若保赤子天上天下咸知向日之忱江北江
南共仰福星之照名垂竹帛勲在鼎彝某十載風塵一
逢烟雨避地居淞江之游憂天如杞國之人功名雖負
于素心窮困尚憐于黔首慮或有于一得口何忍于三

金匱要略卷之七
緘知我春秋罪我春秋欲救顛崖之辛苦待以國士報
以國士終當範我之馳驅俯竭葵傾仰希藻鑑

賀蔡教授到任啟

建學立師本三代之良法化民成俗即二南之遺風夫
以世衰而道微其必人存而政舉喜聆木鐸敢進芻蕘
睠此崑山舞丹崖之鳳石沛然婁水接滄海之鯨波以
山川如是之奇人物由來之盛紛紛顯宦比比高門豪
如劉龍洲乃寓焉賢若李樂菴而居此適值近年之兵

革遂忘舊日之衣冠城郭是而人民非禮義廢而政教
失幸鄉校之不毀今學宮之苟完有司奔走於豆籩多
士趨蹌於禮樂但龍蛇之混雜有鳬鶴之短長中也養
不中才也養不才政賴有甄陶之力仁者謂之仁知者謂
之知豈容無區別之心惟自今秦鏡之明更不致齊竽
之濫大宋小桷匠氏固無棄材貴玉賤珉識者自能定
價嚴一鼓以作氣必三年而有成恭惟某官心醉六經
眼空四海杏花壇上重來鼓焦尾之琴荷蕢門前試聽

擊有心之磬冒次炯玉壺冰露文章垂金薤琳琅曩嘗
居淮海維揚人共仰泰山北斗能不失前賢規矩真可
為後學範模苜蓿闌干且莫厭一官之冷菁莪長育當
挽回吾道之春立登要津入居翰苑如某者蹉跎仕路
流落他鄉不能看長安之花乃亦采泮池之藻聞所聞見
所見星鳳先覩而快哉步亦步趨亦趨蘭鮑久居而化
矣

為王叔才通吳伯善啟

魯連為解紛而出斯為天下之奇陳平能宰社而均終
作朝中之相苟有為于今日亦何異於古人今一見之
竊有請也恭惟某官湖山清氣丘壑閒情雖爵祿不入
其心惟孝友是亦為政車乘下澤稱鄉里之善人樓卧
上床本湖海之豪氣律呂鳴朝陽之鳳階庭舞荀氏之
龍惟其博古通今所以出類拔萃有文舉座上之客而
開尊嘗滿聞駿明堂下之言而執手相知近者悅遠者
來親踈無間剛不吐柔不如好惡惟公藏器待時在邦

必達某許年慕蘭此日識荆深知有長者之風輒敢訴不平之事曩予有子勉作鹽商同客嘉禾王吉父與成交易親書片楮孔方兄俱付檢收不料墮其計中從此置諸度外屢約屢與轉富轉貧但知堆滿贏之金不肯返連城之璧况視予之流落尤縱意而欺凌獸心忍負于朋儔狡窟乃居于仁里望公秦鏡照我覆盆能扶顛以持危必舉直而錯枉風行草偃水到渠成是猶能解戰國之紛亦何異宰鄉人之社道之禮樂示之好惡豚魚必

感而相孚失之東隅收之桑榆犬馬當知其有報心有
所憤書不盡言

為王叔才等訴神文

亘古亘今人世有難明之事誰曲誰直鬼神能灼見其情
雖聰明正直之無私必禍福吉凶之有報請陳始末用
徹幽明切念某至正十有五年作檇李異鄉之客統鈔
三百餘錠買吳江同姓之鹽託在契交信從期約立文
憑之一紙比重託之千金豈其反面無情從此掉頭不

顧彼已跨腰錢之鶴我乃求緣木之魚日往月來馴致
遷延之久雲翻雨覆不勝變詐之多故連年空打白屋
至今日竟為烏有交情既絕禮貌全無本來似鮑叔相
知每去如魯侯不遇彼因致富積醯物之如山我則固
窮避兵戈而失路不念流離之苦轉加欺罔之心日月
不照于覆盆風雨自安于廣廈昔伊過我待為席上之
珍今我尋伊視若眼中之刺是可忍孰不可忍如之何
末如之何既告于隣里鄉黨之間當質諸上下神祇之

之右吾言若謬甘受天誅彼語若誣當遭陰譴願洋洋
之如在降濯濯之厥靈有感必通如響斯應舉直錯枉
必須天理昭彰福善禍淫庶使人心畏服

上周郎中陳言五事啟

李白識韓荊州雖萬戶之封非其所願駿明見鄭叔向
惟一言之善得以相人今區區慕足下之賢敢切切論
目前之事上以裨朝家之清化下以慰郡國之蒼生遠
視欲明邇言可察茲蓋伏遇某官乾坤清氣風雲壯懷

向坐黃堂著蒲鞭之善政今遷畫省冠蓮幕之諸賓有
撥亂反正之才盡扶顛持危之力心不忘於向日義不
失于隨時英聲蜚九重之天遺愛溢三吳之地和氣挽
回于寒谷恩光照及于覆盆見多士如見大賓保斯民
若保赤子能興利以除害不吐剛而茹柔史編當紀其
循良鈞軸政須其贊畫門牆羅列好多培植桃李之春鼎
鼐調和有大有用鹽梅之日更勤吐握以廣咨詢如某者
甫里索居太山高仰折桂之功名蹭蹬衡門之心跡栖

遲雖讀書以聖賢為師但出門則農圃為伍東隣西舍
痛遭毒歛之蛇南枝北風多作無依之鵲歎息愁怨之
聲常聞于田里叫囂隳突之吏每見于鄉隣况軍儲不
積則時有借糴之憂而官俸太輕則必有侵漁之患此
皆繫百姓之休戚疇能出一語以發揚惟大人肯念乎
羣黎故小子敢輸其忠赤非甚高難行之事非荒唐繆
悠之談是曰是非曰非尚從公論聞所聞見所見奚敢
飾詞宜改絃而更張毋刊印而弗予他有剝床而請者

別當借箸以籌之溺猶已溺饑猶已饑斯謂愛民之術
仁見謂仁知見謂知初無私己之謀饒舌云云優容幸
幸謹奉啟并以所言五事開具詣省幕以聞伏惟台慈
鑒念

一開荒田

夫民之有田猶魚之有水也魚無水則枯而死民
無田則饑而斃原民之情豈不欲治田以養其生
哉今長洲縣崑山州等處水深圍田積荒歲久無

錫常熟等處殘破地面荆棘連天其各處流移之民餬口四方而無卓錫之地是皆欲業耕稼以養生者也但所慮者犁鋤纔舉即有征科廬舍未完便當差役是以寧受艱辛且逃租賦寧甘窮餓不還鄉土每歲雖蒙官司招諭復業及委官勸農不為不至而民之所慮如此遂成虛文况各處低田圍岸久壞非一時可能修築積水甚深非一時可以車戽必須隔年料理以俟春耕田家作苦舉筆難

盡如蒙呈達省府行下各州縣踏勘荒田數目叅酌至元年間叅政開荒舊例聽令諸人請佃每年不過若干初年官不徵糧私無租課應干雜役俱得優免次年公私半徵三年成熟然後全征如此則人皆為養生之謀而不憚工力之費一二年間官糧數增國家享無窮之利矣開此荒田官民兩便

一除民瘼

為政以恤民為先若夫民瘼未除而謂能卹之者
謬矣然今之民瘼未易枚舉姑以前月切近者言
之如崑山州等處上年旱澇相兼高田則禾苗枯
槁低田則積水瀰漫各都里正及佃戶細民經官
告狀俱有堪信顯跡不期驗灾官吏不行詣田踏
視從實免征止坐各州縣衙門及諸寺觀逼令鄉
胥里正一槩伏熟繼後部糧官吏驗數征納其細
民棄業逃亡十去八九但將各處里正緝扒吊打

責限陪比破蕩家產終不能足幸蒙上司體察里
正人等發下所屬州縣乃得疎放立案擬于秋糧
內帶征若今歲秋糧之時果于里正名下追征其
里正百孔千瘡奚暇再剗其肉以補于茲必着落
原佃之人一同部內上下交征決致失所况連年
兵革擾攘差科繁重里正人等俱各消乏誠不能
以一歲之所收辦兩年之租賦縱使捶楚之下求
而得之甚非國家愛民之意亦非諸大臣恤民之

政也如蒙言諸省府移文郡邑從實免征庶使里正之家免于破蕩力田之衆不致逋逃非惟今歲秋糧易于辦集而亦免下年荒廢其田矣除此民瘼斯民幸甚

一抑豪強

貧富不等借貸有之舊制民間私債月息三分年月雖多不過一本一利誠良法也近年以來其官豪富強之家乘人之急取利過倍少有逋欠凌虐

百端或于借貸之時勒令併利作本虛立文約明
起三分利息實收過倍之數或有還欠利息倒換
文憑利上生利或寬收窄放更易斗斛或左右邀
求減剋分例其舉逋還債之人阨于窮窘吞聲忍
氣莫敢語良可閔惻上年幸而官府知之出榜禁
約但久弊不能頓除如蒙申明舊制定立罪名嚴
加禁治庶使權豪嗜利之徒畏懼憲刑毋蹈前非
抑強扶弱公道幸甚

一積軍儲

為國之要足食足兵然兵固不可無食而用也但
頻年水潦歲無全收如無錫常熟等處殘破之餘
田地拋荒租糧減數今國家軍儲之用常恐不敷
況凡有賞勞俱用米粟動以數百千石為無益之
費至于青黃不接軍人有缺食之憂百姓有借糧
之患竊嘗觀之有司催辦米如珠璣濫賞贏餘粟
如塵土此理曉然人所共見今後宜從省府移文

稟知太尉遇有功賞從公斟酌或以多爵之榮或
犒以金銀等物樽節米糧以備饑荒如此則倉廩
之積日增月羨漕運可供軍儲可給而民無和糴
預借之患矣多積軍儲公私便益

一增俸祿


張官置吏本以治民黜陟幽明欲其稱職然必須
俸祿足以養廉然後考其成否而黜陟之斯可使
之無憾矣今府州縣之職最為繁難大小官吏之

俸類皆鮮少仰事俯育寧免素心洗手奉公誠不易得其間以貪污黜罷者固不足恤而清貧廉介祿不償勞者上之人宜軫念之如蒙建言本省告之太尉以官吏俸給之數酌古準今量加增益如此則居官者可以絕貪墨之心百姓無侵漁之患矣傳曰忠信重祿所以勸士俸祿之增公道幸甚賀僕知州到任啟

騎竹羣童爭先遠迓扶藜一老敢進常談或可比乎芻

堯庶無棄于管蒯嘗謂州縣作民父母詩書為世範
模必須酌古準今乃能承流宣化蟠根錯節毋令
挫利器之鋒流水高山正欲奏朱絃之曲夫御吏治
民之要惟正己格物為先吏或奸欺民多疾苦但鄉無
叫囂隳突之吏則田無歎息愁恨之民照日月于覆盆
轟雷霆于蟄戶寬猛相濟恩威並行省刑馴致于無刑
聽訟當期于無訟魯中年之淑化官至司徒黃潁川之
循良入為丞相苟有為于今日亦何異于古人恭惟某

官屢世簪纓一門科第金薤琳琅之文采玉壺冰露之襟懷花縣相傳藹仁聲于荒服蒲鞭不用布德澤于疲氓下車纔一月之間比屋皆二天之惠皜皜乎不可尚恢恢乎其有餘鵲鷦之巢一枝本非素志鳳凰之翔千仞方進修程跂余望之自此升矣某素嘗仰斗近獲披雲過蒙禮貌謙謙喜聽政聲藉藉茫寒有賴猷曝何慚三千年黃河一清坐待太平之日九萬里搏風直上佇看大用之秋有猷有為善頌善禱



龜巢稿卷七

欽定四庫全書

集部
龜巢稿卷八

詳校官監察御史臣劉湄

中書臣劉源溥覆勘

總校官知縣臣楊懋珩

校對官主事臣陳文樞

謄錄監生臣張元愷

欽定四庫全書

龜巢稿卷八

元 謝應芳 撰

啟劄子狀箋表

蕭谷張納幣啟

松堅晚節梅占春魁恭惟某官起居有常動靜多福某
幸扳華閥獲締葦盟敬憑一紙之書用效七襄之報祇
詞燕申且嚴鱗甲更冀順和平之序而加調甘旨之羞予
日望之自此升矣出使展埋輪之志閥閱殊高封侯由

金匱要略卷八
給餉之功源流已遠幸二姓之合好占八世之莫京令
姪精習讀書拾芥之功名必取孫女粗勤織紝采蘋之
法度能循荷封非之不遺俾兼葭之有倚茲承奠雁喜
近乘龍第慚奩具之蕭條莫稱洞房之張設幣帛筐篚
其厚意拜而受之男女室家之大倫永為好也

答請期啟

合歡尋月老之盟將偕鴛偶渭吉訂星翁之厯乃遣魚
書既承黃絹之好辭敢謂綠窓之難嫁曰迎鸞於桃李

春風之日尚喜從容欲奠雁于松栢歲寒之時何勞鄭
重蓋篤婚姻之好合崇道義之交迨其吉迨其今敬聞
命矣宜其家宜其室適我願兮

賀闕信卿生日

壽八十歲三月初一日生

生申令辰二月後初交三月比彭高壽十分中纔是一
分子孫克肖而俱賢歲月方來而未艾敬將薄禮仰祝
修齡非熊非羆夢必形於西伯如岡如阜壽將比於南
山申賀率然丙融幸甚

張回鄒定姻三幅啟

綠野春明畫堂日永某官百靈交相多福駢臻某遙望
隣封近通姻譜仰辱問名之禮敬酬交好之書心馳宴
居首陳魚素敢冀對乳燕青春之景而加調紫駝翠釜
之珍愛助一杯勤倦三祝昔南軒以道鄉可敬曾為跋
甘泉之銘今東泊與時干相聞且喜接隣封之境惟先
世斯文舊契宜後人此日新婚令嗣筆豔春葩力勤儒
業姪女燈明夜績志在女紅幸有良媒乃成佳偶采下

體菲封之外將厚意筐篚之間受言藏之永為好也投
我以桃報以李正三春桃李之時丈夫有室女有家乃
百歲室家之願有懷依倚無任欣榮

陳彥謙府史滿歸惠錢舜舉畫遣禮答賀

發軔修程十載試蕭曹刀筆還家遠惠一緘遺顧陸丹
青愧予龍鍾失此燕賀想萊子斑衣之樂勝買臣畫錦
之榮不腆送芹切希笑粲挿茱萸遍兄弟子胥樂兮投
木桃報瓊瑤我無是也

娶婦拜祖先致語

伏以有夫婦而後有父子大矣人倫故齋戒以告鬼神
重乎婚禮幸及時以成家室敢即刻以覲祖宗參酌時
宜兼從古制既不忘於報本乃可得而合歡濯濯厥靈
降藍橋之仙宅洋洋如在坐花燭之瓊筵伏願先世垂
恩新人蒙福有是父有是子一門天爵之榮宜其室宜
其家百世雲孫之盛

合卺致語

竊以禮言合卺自古有之俗曰交杯其來尚矣于結髮
百年之始合開顏一飲之歡孔雀屏中選當年竟成伉
儷鴛鴦盞同傾此夕豈不歡娛伏願孝順庭闈諧和琴
瑟新粧不俗朝朝畫張敞之眉敬對如賓日日舉孟光
之案詩曰花燭春輝照洞房藍橋仙偶飲瓊漿開花
結子三千歲人與蟠桃壽總長

拜舅姑致語

伏以男女居室之願喜得及時父母舅姑之尊先當行

禮欲居敬而行簡乃酌古而準今試看花燭熒煌何異桃源會集拜舅姑而及舅姑之宗族拜親戚以分親戚之尊卑各致殷勤咸加恭敬伏願夫夫婦婦同心和順於六親子子孫孫一氣流傳於百世

趙與蕭請期啟

嘉會合禮尋月老之姻盟內事用柔訂星翁之日歷納幣於小春良月之吉御輪於大寒信宿之先是用成行必蒙允諾歲月日時無易迨其吉兮男女居室大倫永

為好也寸片脩敬一粲為榮

趙與蕭聘啟

蘭陵之蕭衣冠素盛石橋之趙門戶今寒月老書其姓名雲孫知為僥倖令孫女鍾禮郝法乃天生真淑之姿某男周誥殷盤亦日誦聖賢之訓曩中牽絲之選時為佩鰥之童數年粗喜其長成六禮豈容於缺畧男女之際婚姻之始區區幣帛之將父母之命媒妁之言永永室家之好

蕭答陶納幣啟二首

十月小春一年好景恭惟某官起居惟適祿福是宜某
舊日相知新婚可喜辱子雲之筆札効女星之報章躬
問宴居首陳鱗幅其必對畫閣紅爐之景而加調紫駝
翠釜之羞善保儒珍早登仕版

讀五柳先生之傳何慕清高論八葉宰相之家俛慚寥
落夙昔友一鄉之善婚姻占八世之昌令嗣誦詩讀書
克脩儒業孫女治絲執紼方習女工既叶鳳占將成鴛

偶辱錦繡之贈如此之瑋瑤之報奈何受言藏之永為
好也兄弟子猶子愛芝蘭玉樹之芳父母心為心喜松
栢女蘿之施

王答鮮于定婚啟二首

菊存晚節梅近小春恭惟某官森衛百靈起居多祿某
因親雖舊結好惟新來書粲四六之文復狀致再三之
敬寅恭上問未竟下忱其必順風霜氣候之清而加養
玉雪丰神之秀佇膺鶚薦即奮鵬程

宋相以福星為比族望殊高晉人以崑電見稱風流何在詎圖僥倖乃締婚姻令嗣能讀父書功名必取孫女勉遵姆教工巧何能既赤繩繫足之有緣當舉案齊眉之永好一誠相體六禮何繁笑折黃花答今日殷勤之贈寄言紅葉待他年伉儷之諧

張與巢求贅親啟

交情至舊真如鮑叔相知姻事從權欲效秦人出贅茲蓋天作之合亦云時措之宜欲以幣交未蒙金諾先此

行成于月老便須涓吉于星翁所恃久要毋嫌欲速就
爾居就爾宿送劉郎暫入天台從如雨從如雲看韓姑
終歸蹶里獻芹可愧鑒茹為榮

王與巢定婚啟

二首

楓錦裁紅荷衣換綠恭惟某官考槃阿澗詒福岡陵某
密邇鄭鄉喜諧齊偶爰發鹿皮之幣敢修魚腹之書
上詞履祥初嚴蒙吉對去燕來鴻之景進烹龍魚鳳之
羞前迓恩榮下情煩禱

洗耳臨流水千古高風拄頰對西山一時佳致雲孫幸
甚月老書之令姪女養在深閨兼備德容之美小孫男
出就外傳粗知禮義之方亦云鳴鳳求凰詎謂食魚必鯉
問名伊始合好惟新男女居室大倫願言偕老幣帛筐
篚將意幸與包荒薄侑寸芹別陳尺楮

王與符定婚啟

二首

風露雙清水天兼淨恭惟某官于時處處降福穰穰某
雖隔花封忝居葭黨敢奉尺書之敬仰干丈席之尊既

諏茵帛有嚴簡書當桂子餘香之秋得棣萼相輝之樂
請稽月令善保天和

樂施恩多尚書令遺風可仰太平策在文中子正學誰
傳過攀閥閱之高乃合婚姻之好令姪女閨房毓秀粹
然四德兼全姪孫男燈火相親勉爾一經粗習所幸中東
床坦腹之選豈非藉赤繩繫足之緣問名通魚腹書將
意遣鹿皮幣薄乎云爾歸斯受之夫婦有室父母心信
前緣之不謬婚娶論財夷虜道知高誼之不然

請期啟

婚姻無六禮之繁實欽高誼唯諾若干金之重足見真情行成既托於冰言涓吉乃稽於星厯擬三月中旬之始合百年佳偶之歡想周南梅標有詩看陳村杏花堪畫得及時也式我願兮承願當合卺之期敢云燕喜將意表折梅之敬尚冀包荒欣忭有餘敷陳罔既

王聘巢啟

男女擇德聖賢之訓昭然婚姻以時父母之心同爾願

言合好底免愆期令女四德兼全天生淑質小孫一丁
粗識日習遺經念厥祖之暮年宜此兒之蚤娶幸蒙金
諾肯賜玉成敢將奠雁之儀就訂迎鸞之約後觴九日
星在戶星在天御輪三周從如雲從如雨

請巢氏父母送鸞二首

男室女家喜畢大倫之事山殽野蔌可無小酌之歡敢
望高車肯過衡宇相邀愧泥濘勿辭送仙子乘鸞高誼
薄雲天所願得嘉賓式燕

許年聞林下之風喜成姻婭後夜聽鐙前之語願叙團
圓仰屈魚軒寵臨蝸舍之于宜家宜室必加敬式之辭
騎從如雨如雲將見爛盈之美

請符氏父母送鸞二首

居室大倫喜佳期之在邇婚姻良會宜此夕之為歡掃
羅雀門迎衛鸞從烹葵邀上客甚有愧于荒涼隨柳過
前川必不辭于光貴

嫁織女于河西依稀渡鵲降姮娥于月下縹緲乘鸞跂

予望之切有請也燕衍如兄如弟適當姻禮之初象服如山如河願覩母儀之盛

蕭聘張啟

張良為功臣與蕭何同稱三傑張禹有愛女嫁蕭咸而得近居既兩家先世如斯宜百世姻聯于此令愛育閨房之秀能采蘋繁小姪當門戶之勞頗知稼穡僥倖中牽絲妙選因循欠納幣常儀欲調羹以奉其慈闈奈乏人而主乎中饋禮慚遲慢事幸速成雖無雙璧之將已

拜百金之諾今日聘明日娶即迎鸞從之歸五世昌八
世京永叶鳳占之吉

姪娶請親翁啟

吾弟惟一息幸畢婚姻女子願有家必蒙往送望公車
騎光我階庭挹丹桂之香風玩清秋之明月花燭洞房
之喜相與欣欣竹林步兵之遺不妨袞袞

張答鄒請上客啟

二首

兩小無嫌蒙養喜成夫婦一尊重與太平宜會婚姻伏

辱寵招本當趨赴藉手之荆釵之飾何顏覩花燭之輝
男有室女有家且遂齊眉之樂膏吾車秣吾馬別圖會
面之期

童婚三載喜合卺之有期王母肆筵辱貽書之見名維
慚蓮髻合拜蘭姿奈老態之龍鍾久無心于燕樂梨花
夜月對繡佛以長齋花燭春風想金屏而多喜

代王孟學答張希良賀乃父置妾劄子

一婢赤脚家君每謂包羞雙魚素書使者乃蒙言賀適

逢早出難擬暮歸僭啓三印之封景見八珍之貺本無稟
命合用繳回奈雨師滂沱之未休恐星使往來之多累弗
辭躡等遂用拜嘉今日目前甚愧瑯瑤之匪報他時膝
下當言珠璧之暗投

賀置壽器劄子

鼎新壽器比銀鏤之黃腸珍重安居喜玉枝之無汗雖
賢達豫謀其身後歡娛益享其目前是用送片敢希笑
粲賦詩自挽君應有陶令佳章荷鍾相隨誰不慕劉伶

高見

王文甫嘗卧疾諸親友探問醫禱禮意甚勤疾愈欲置酒叙謝未遑也至是設盛席招之凡十有七人各書以請

歌偈仄行念隣民之久別作真率會慕前輩之遺風擬茲廿一日清晨舉我二三年缺典踏雪沽酒敲氷煮茶思向來採薪之憂難得此盍簪之喜白髮三千丈相看若圖畫之奇金釵十二行但愧欠笙歌之盛

右請蕭桂岩

曩歲負薪之憂屢厯存問今日折梅之信敢有相期卜
大寒一日之先作小酌三杯之歛願陪談笑并謝扶持
奴白飯馬青芻聊盡少陵之意膾金鑿羹玉糝真如坡
老之詩

右請蕭舜卿

讀床頭易屢蒙枉問冰廬稱飲中仙每羨隱居雲壑斗
酒將謀于小席尺書預奉以邀賓待堯奠四莢之新如

蟠桃一花之會志于道據于德勿云冠佩之殊和其光
同其塵聊共壺觴之樂

右請吳雲陵

往年問疾屢荷殷勤晚景居安寧忘感激開小閣會數
人之客至大寒先一日之期沽酒謝玉川先生下榻待
南州高士折梅逢驛使寄言報幽谷之春看竹到貧家
毋吝踏前村之雪

右請趙師呂

向來問病曾勞得得相過老去投閑願奉元元高論將
社酒一杯之舉待堯冀四莢之更亟掃蝸居祗迎鶴駕
陶陸同社幸無麴蘖之嫌孔李通家況在葭莩之末

右請姜紫霞

曩辱問平安之竹念我顛危邇來對索笑之梅思君契
濶速客先大寒一日呼兒辦小酌三杯敢用坐邀辛母
他却頗嘗見此客不談塵生風顧安所得酒乎隣跼踏
雪

右請張伯起

往日負膏肓之疾多荷扶持連年懷肺腑之親無由會
集當此嘉平之月適為閑暇之時敢謀廿一日泥飲之
歡何異三千年河清之會願切有請惠然肯來摘我園
中蔬盤飮初無異品為此席上客襟懷皆喜相知

右請陳嘉會

昔擁衾聞鬪螳之聲曾勞下問今對酒如長鯨之吸願
與高談期大寒一日之先望清早羣賢之集螳浮仍臘聊

金匱要略卷八
索笑于梅花騎氣如虹必增輝于蓬華

右請月仲承

故舊不棄曩勞問疾于吾廬潦倒餘生合罄謝言于姻
黨在嘉平下旬而先一日擬延留上客以共三杯酌言
醕之切有請也有客過茅宇跼然空谷之音携酒看芝山
乘此剡溪之興

右請蕭定卿

人生幾何汨汨塵勞之事歲聿云暮區區擬飲之謀待

堯階換四英之萸望慶亭來五花之馬爐煨芋栗瓮瀉
茅柴一簞食一瓢飲聊奉笑談之樂三握髮三吐哺豈
辭迎肅之勞

右請陳君惠

疾病相扶持常懷往事故舊則不棄可無謝言敢于後
甲三日之期聊為知己一杯之款願切有請貴然來思
瞻彼牛臺郊騎攬搖金之轡過茲蝸舍長鯨吸樂玉之
舫

右請翁深甫

有患有身曾荷扶持之賜相親相近豈忘感佩之情欲
謝殷勤久成稽緩廿一日專邀大旆三五杯聊奉清談
地爐煨酒暖如湯仍浮臘味金城土酥淨如練試簇春
盤

右請姜用佐

卧痾三載之先曾勞請禱話舊片時之款屢欲邀迎奈
何日出事生至此江空歲晚先大寒之一日集佳客之

數人對月歌竹枝當盡留連之意搏拳握松子願陪少
俊之歡

右請周華甫

饋樂感康子之意懷不能忘置醴敬穆生之賢願切有
請大寒之前一日小集之歡片時誦陋室銘望高軒過
灰香芋栗菲然盤飮之微索笑梅花忘却緼袍之冷

右請陳君傑

有患有身往歲幾成枯朽是父是子當時多荷扶持奈



相逢傾蓋為難遂久失舉杯稱謝先大寒之一夕請小酌之三杯田家拊缶之歌嗚嗚共發故人綈袍之意戀戀相看

右請張漢傑

曩歲負薪之憂疊承書問今日折梅之信專用邀迎先一日于大寒會諸賓于小席煩君騎從過我蝸居觥籌衆賓之歡聊復爾耳綈袍故人之意何日忘之

右請陳仲祥

老無能為每有索居之歎歲聿云暮可無良會之歡先
大寒一日之期辦小酌三杯之款願切有請惠然肯來
注玉傾銀笑田家之老瓦搖金織翠過才子之高軒

右請陳伯將

賀符君彥遇恩劄子

平地風波偶罹人禍覆盆日月喜獲天恩惟吉直荷天
之休使橫逆如水之釋某有懷燕賀無奈龍鍾敢將片
曝之儀少助竹林之宴叫囂東西隳突南北笑前時悍

金匱要略卷八
吏之來觥籌交錯起坐喧譁想今日醉翁之樂

王與金定姻三幅啟

二首

四月維夏南風之薰恭惟某官台候起居多福某素聞
華胄新締葦盟敢於六禮之初輒上一箋之敬

寅恭事上申敬如前所冀順清和之時而加調甘旨之
饕行膺芝檢即上蒲輪

秬侯珥貂之孫猶能世顯葉令飛鳧之舄豈得家傳媒
灼殷勤婚姻繾綣令孫天生淑質兼全四德之稱小孫

日誦陳編方盡三餘之力得佳偶之諧若此為大父之
樂何如禮宜問名幣以將意王郎嬌客勿戲嘲坡老之
詩金縷綉襦想富若樂天之語

新親賀冬至劄子

鳳鳴占八世之昌婚姻締好儀畫驗一陽之復時序更
新循乃常儀賀此佳節恭惟某官道隨陽長德與年高
炯炯然若清冰英標拔俗溫溫乎如愛日和氣接人方
霑賜帛之恩將見安車之召某傾心仰斗轉眼書雲寄

殷勤聊折梅花諧伉儷將尋瓜葛日迎脩晷喜添紅線
之工月閨來春擬講青廬之禮

新親賀七夕劉子二首

瓜果庭前望鵲橋之仙偶芙蓉江上尋鴛侶之嘉盟因
景物以興懷具禮文而脩好恭惟某官黃山毓秀綠野
居閑立志清高欲追蹤于巢父無心機巧豈徼福于天
孫其初筵露浥之餘必遠召天書之至某謀身甚拙晒
腹無書卜兒曹鸞鏡之圓看女子蛛絲之喜獻芹可愧

笑粲為榮華屋神仙想穿鍼于良夜洞房花燭宜合卺
于明年

月老檢書久定婚姻之約天孫分巧豈無兒女之情敢
徇彛儀以賀佳節恭惟某官令名揭日壯氣橫秋縹緲
十二樓正宜供阮庭之錦拍塞五千卷又兼晒隆腹之
書舉頭睹銀漢祥光拭目進青雲高步某俯慚蹇拙仰
慕清高以瓜果之時羞問梧桐之秋月薄乎云爾歸斯受
之當此時占喜蛛絲擬來歲往迎鸞從機杼織作毋勞

吟草堂之詩黼黻文章但願遂柳州之禱

新親賀端午劄子

訂月下書幸締朱陳之好賀天中節合循荆楚之風景
物來前禮文敢後恭惟某官身具蕭爽居則清高月旦
有評比南州之高士日長無事卧北窻之清風九節蒲
聊用引年三年艾殊堪濟世獨醒咸羨多福鼎來某舉
目葵榴馳情瓜葛雖所獻非雪羅風葛或可留付霧閣
雲窻星候起居雷同問訊角黍達昌歎遙知盡華燭之歡

兔絲階女蘿續當有佳期之約

納采道日劄子

伐柯以斧言當納采之時差穀有書喜得用柔之日雖
居敬而行簡亦酌古以準今待季春更六莢之冀效野
老獻一片之禮惟無責備必賜包荒鶯語丁寧報金谷
東風之信鸞粧次第看玉臺明月之圓

問名道日劄子

月老檢書幸自天而作合星翁視歷敢擇日以尋盟後

金匱要略卷八
中秋八日之期結佳偶百年之好切有請也能無從乎
獻芹聊效野人題葉試看流水男女之際婚姻之始禮
合盡於殷勤父母之命媒妁之言願早諧于伉儷

袁與陸三幅啟

二首

綠野春明畫堂晝永恭惟某官考槃在澗增福如川某
忝在舊交喜成新好敬致鹿皮之幣敢陳魚腹之書躬
問燕居首陳魚素尚冀對朱雀烏衣之景更加調紫駝
翠釜之珍引養引恬善頌善禱

累世傳象山之學共仰高風無人問牛渚之舟有慚明月鳳占既叶鴛偶期諧令愛育秀閨房生乃全於四德某男服勤門戶學則悞於三餘荷封菲之不遺俾絳蘿之為好薄言納采厚望包荒春水桃花江上遣長須獻鯉秋風桂子月中迎仙女乘鸞

鄒與陸聘啟

甫里世居門望偉鬱林之石道鄉家學師傳本伊洛之源藉冰語以聯姻實雲仍其多幸丁寧鶯語催促鸞粧

令愛夙奉母儀禮已閑於內則愚男勉承父訓書頗讀
於中庸顧惟在飄泊之餘願早遂團樂之樂六禮之文
雖簡雙親之意實殷尚冀包荒毋嫌欲速迨今迨吉當歌
梅標之詩宜室宜家喜對桃花之景送芹可愧笑粲為
榮

新親賀冬至劄子

八世莫京幸陰騭鳳占之吉七日來復喜陽生犧畫之
初婚姻方重於交歡節序合先於稱賀禮雖效芹羹之

獻物乃如葭灰之輕餘皆削去繁文昔已感承嘉命既
書雲物便約星期香閣日長看刺繡新添之綫梅欄春
早遣過庭親迎之車

朱答李取男帖贊姻劄子

某揆辰珠滴檐花翠搖門柳恭惟某官考槃其在阿在
澗介福則如崗如陵某依仁居鄭公之鄉粉榆甚邇贊
予效秦人之俗瓜葛維新荷不鄙西家之愚乃獲中東
床之選首蒙厚禮言締嘉盟月下老既辱來前春帖子

敬當納上題書桐葉足知流水之多情寄語桃花將續
仙源之盛事某伏望翠蓬星眷戩穀日增倘有委令毋
吝放曉

社學聘章

用黨庠術序之良規學開鄉社求蒙養聖功之成效職
在師儒賴琴堂為擇範模使編戶得從規矩文風聿盛
化雨俱霑恭惟某官學有淵源眼空淮海一斑窺見蚤
遊風紀之司千仞翱翔遠避烟塵之境適張公為江海

之客知伯牙有山水之音將欲脩鶚薦之書先請坐臯
比之席姑鳴教鐸以俟徵車某願雲龍以相隨觀星鳳
而為快敬將聘幣亟往招旌設絳帳於張林來青衿於
鄭校予潔予進勿謂互鄉童子之難言予勤于思即若
國子先生之善誨

代朱弘道請張子安昆仲等

別多會少居常諷詠於停雲時和歲豐欲叙笑談於終
日邀上客一杯之款在中秋三日之先舉匏樽丹桂花

前候蘭棹白蘋洲畔難兄難弟必能與吾弟偕行明月
明年更約似今年同賞臨書率爾望賜惠然

新親賀冬至劄子

新婚交締占八世之莫京寒暑薦更喜一陽之來復節
期在邇候問宜先恭惟某官韞玉儒林濯纓芳浦高標
絕俗炯若清冰和氣接人溫如愛日蓋鍾以湖山之秀
而得夫詩禮之傳棠棣聯輝才華益著書雲記事坐評
魯史之祥賦雪成名行赴梁園之名某弟兄舊愛兒女

新歡眷言尋合好之盟傲禮作踐長之慶念因親致親者久矣視居簡行簡而恕之葭灰飛緹室之時且酬佳節花燭盟洞房之夕始待初春謹此申聞伏希丙在

新婿整容致語

昔年占鳳皆云家世之昌今日乘龍果見門闌之喜繼桃源之盛事留花燭之良宵魚水交歡燕雀相賀某人胸藏錦繡口吐珠璣種玉有緣聘婦投其雙璧玉釵金既富傳家兼以一經將盡他張敞之眉先整我潘安之貌

秋水為神玉為骨人謂無雙芙蓉如面柳如眉天生一
對敢陳蕪語用贊華姻詩曰 一雙新偶錦鴛鴦百歲
和鳴翠鳳凰最喜天姿如傅粉不須湯餅試何郎伏願
結髮維新齊眉永好夫夫婦婦常調琴瑟之音子子孫
孫克紹箕裘之業

新婦整容致語

天孫配鵲橋之仙相依銀漢秦女得鳳簫之偶並樂瑤
臺蓋居室人之大倫而婚姻世之重禮既諧鳳卜宜趣

鸞粧某人珠箔銀屏繡襦金縷梅花點額作壽陽宮樣
之奇桃葉宜人有周南國風之美眼橫秋水眉歛春山
香閨移步步金蓮合卺出纖纖玉手不施朱粉本來如月
裏姮娥若論清真尤勝於人間西子欣逢好合敢頌輿言
詩曰 紅葉殷勤不負人燭花今照洞房春紅綵隔幔
牽情久羅帶同心結好新伏願夫唱婦隨天長地久五
男二女享盛福於高年四德三從著香名於彤管

新親遣使請上客致語

兩姓為婚永結朱陳之好千里命駕當如嵇呂之交持
來雙鯉之書請送乘鸞之女柳筵盛設花燭歡迎某官
喬木世家耆英人物美矣育閨中秀愛之如掌上珍繡
褥金屏李監宅門闌之喜瑤簪珠履孟嘗君賓客之多
既當年擇對東床宜此日送行南浦金勒馬嘶芳草樓
舡燕蹴飛花明月隨人春風滿路從如雲從如雨之子
于歸星在戶星在天嘉賓式宴

云

請期劄子

曩中雀屏孫謀以為幸事今觀鳳歷親迎而有良辰越
流觴三日之期請合卺百年之好燈花有約梅標及時
投以李投以桃用請期之常禮宜其家宜其室締諧老
之佳盟專此申聞諒惟丙在

請男上客

五日季春兩家合好烹葵邀上客因舊親以結新親杖
藜立芳洲望早酌而娛晚酌

請女上客

金人元好問集卷八
後楔三日婚姻百年織女渡銀河鵲橋懽諧星偶王母
會瑤池燕衍早駕雲車

李回徐再婚聘啟

因親致親之好從古流傳舊婿新婿之詩正宜重詠魚
腹聿來其書尺鸞膠將用於續絃令姪醫緩齊名以聰
敏旁通儒術小女姊娣同氣乃殷勤粗習女工齊眉之
案雖新坦腹之床不易自天作合如月仍圓琴瑟鐘鼓
之樂故多幣帛筐篚之將何勝前日受今日受不妨聘

禮之來舊雨來今雨來重見御輪之喜回片菲薄副楮
條之

答請期劄子

婚姻憑月老之言幸成佳偶聘娶攷星翁之厯喜有良
辰催花雨正此連綿五朶雲遽然飛墜敬聞命矣迨其
吉兮男女居室大倫古今所重歲月日時無易遲速何
辭

答納幣三幅啟

花朝餘景桃雨方晴恭惟某官天相閒居日膺盛福某
僭扳華閱幸締萼盟輒回魚尺之書專問燕居之敬

祇調燕申已嚴魚甲尚冀對芳菲之景而加調甘旨之
羞善保安閑式副頌禱

一舍相望皆住鶴溪之澣二姓合好永諧魚水之歡載
笑載言迨今迨古某人案頭燈火殷勤黃卷之間而某
女針指衣裳寂寞綠窓之下荷不遺于對菲斯可擬于
松蘿納幣今朝結褵有日桃花灼灼喜婚姻如此其宜

瓜瓞綿綿看嗣續將來之盛回儀非甚副剡條之

納幣啟

張知府子聘盧推官女

文武才之並稱夙欽華胄齊魯論之兼講甚愧微宗知
心本出于同鄉愛子乃求其嘉偶鄰封伊邇姻好維新
今愛四德俱全自是閨房之秀長男一經粗習尚須燈
火之工雀屏幸中於前時鴈幣宜陳於此日星翁涓吉
月老行成承筐之意既將合卺之期可待鐵瓮城山花
夾道似入桃源金斗門官柳長街將迎鸞從寸芹菲甚

副楮條之

賀娶弟婦劄子

令弟號河東之鳳生有奇才仙娥乘月下之鸞來為佳
偶禮成合卺喜溢連枝想洞房花燭以歡娛送野老芹
羹而慶賀壻荒交作一家藹和氣之春琴瑟和鳴百歲
永齊眉之好薄言申控厚望丙融

又

兄督厥家重乃友于之義弟宜其室合茲宴爾之歡鳳

卜有靈鵠原多喜某人胸襟量濶洪如萬頃之波手足
情親常共對床之雨稱二難於月旦行六禮於婚姻某
忝在葭親敬持芹獻想鴻雁之行有喜受燕雀之賀無
言翠舞珠歌花燭夜驩諧伉儷金昆玉季桃源洞盛集
神仙俛述蕪辭仰希藻鑑

納婿請上客

得賢婿美如玉潤樂與同居慕親翁文有金聲願陪情
話高軒寵過陋室增輝

請親眷送婿

女插荆釵幸致東床之婿客來茅宇毋嫌南阮之貧傾
蓋有期執盃專俟

又

得婿如桃源之樂琴瑟和鳴邀賓共花燭之光樽卮小
酌式相好矣請無却之

瑣瑣之姻納婿欲叙團樂親親之長來賓誠為光飾再
三申敬千萬寵臨

祖為孫娶請親家狀

抱孫欣有室之年寔為僥倖送女見宜家之好共樂團
樂花燭將送慈裾寵賁

祖母娶孫婦請親家母狀

孫娶而倚門龍鍾亦笑女行而結帨鸞從將臨願覩蘭
姿請移蓮步

問名三幅啟

萬答蔣

天方嚴肅月乃嘉平恭惟某官台候動止多福某交蒙

舊愛姻締新盟承書檠駢儷之文答簡致殷勤之意

前陳候問上徹覽觀尚加調紫駝翠釜之珍以安處畫閣紅爐之樂蒲輪有召梓里增榮

山隨蔣姓大宗夙著於圖經莊用萬名先世亦稱於鄉國荷雲誼平居而交契宜冰人相語以聯姻令孫誦詩讀書承祖風之淳謹小女治絲執臬遵姆訓之工勤吉從鳳占喜成鸞偶擇德之初心既遂問名之彛禮何多受言藏之永為好也竹開三徑相望如倚玉之榮梅贈

一枝聊仰作報璫之敬

請新親家翁狀

愛女甚於男人皆美安昌之比見我有此客孰不云文
定之榮請式宴以交驩望御鸞而光賁

請新親家母狀

降月府之姮娥佳期在邇宴瑤池之王母良會維新立
候蓬門望移蓮步

謝免糧表

兩浙奉蠲租之詔恩意天寬羣黎懷結草之心懽聲雷
動睠斯民而得此實亘古以無之欽惟德合乾坤明同
日月生知安行之聖巍巍成功以博施濟衆之仁洋洋育
物干戈既戢禮樂聿興普天率土慶以來歸甘露卿雲
紛其呈瑞臣某等叨居劇郡幸遇明時遙瞻丹闕之光
仰效華封之祝一曰壽二曰富龜疇之景福無疆千斯
倉萬斯箱農晦之豐年多慶

中宮箋

德配一人聖政有內廷之助恩霑兩浙公私免編戶之
征臣庶均歡古今希遇褙衣合則垂懿範於宮闈彤管
紀功示母儀於邦國厚同坤載壽與天齊臣出守微邦
蒙恩大幸家給人足喜關睢麟趾之化行時和歲豐後
龍馬龜圖之瑞出

東宮箋

主器叅萬機之政日用三朝綸音蠲兩浙之租恩霑庶
姓震長居儲離明協照星辰河岳煌煌氣象之新車服

旌旗奕奕威儀之盛夷夏咸悅春秋鼎來臣等藩守至
微葵誠上謝農餘粟女餘布樂謳歌朝覲之歸書同文
行同倫統侯甸要荒之服

聖節賀表

九月初五日

皇天錫美篤生聖哲之姿化日舒長馴致雍熙之治春
秋鼎盛夷夏咸懽欽惟德配二儀量包六合立綱陳紀
同天下之車書偃武修文舞階前之千羽蠲租賦以紓
為民者之力增俸祿以養為官者之廉庶績其凝彛倫

其叙臣某叨居郡守陪列朝班黎獻為帝臣粵有陶唐
氏萬邦之衆壽富多男子敢效華封人三祝之誠

千秋節賀表

誕彌厥月先重陽五日之期時入惟天繼洪祚萬年之
業永隆邦本大愜輿情敬惟以孝以仁惟明惟允鶴駕
鷄鳴而問寢朝夕承顏龍行虎步於太平乾坤篤祐丕
承寶緒益衍瑤圖某等微若草茅誠同葵藿望神樞之
電繞壽祝儲宮願化國之日長恩霑寰宇

冬至表

龍飛御九有之師尊居丹宸犧畫驗一陽之復律應黃
鐘愛日舒長普天蒙福欽惟乾坤合德日月同明度越
古今用武功而平四海制作禮樂敷文德以教兆民當
亞歲之令辰納應時之洪福某忝居小邑阻賀大廷干
羽兩階想天顏之有喜衣冠萬國仰雲物之餘輝

東宮箋

七日來復陽生緹室之初八表依歸位正青宮之久欣

逢令旦茂輯嘉禧敬惟天生聰明日新成德能仰承於
聖訓用叅贊其皇猷眎金鏡以納忠義崇風紀奉玉卮
而上壽恩重天倫邦本益隆輿情允愜某叨居下邑賀
語前陳夙興視膳而問安更有書雲之喜賢佐保躬而
傳德尚論愛日之誠

中宮箋

陽生葭管天時妙幹於玄機懽藹椒闥日晷新添於紅
線掖廷和樂寰宇清寧敬惟壽與天齊德同坤厚萬乘

至尊之賓敬雅重祿衣六宮內則之教修尚勤元統載
逢令節益介繁禧某微若草茅誠同葵藿履長今日宮
中奏式燕之娛習美成風天下賴關雎之化

正旦表

普天率土幅員歸一統之初獻歲發春正朔屆三朝之
始時調玉燭喜溢瑤墀欽惟聖德乾剛神功震赫蕩蕩
乎如天之大人所難名昭昭乎如日之升物無不照履始
和之吉月嚮洪福之萬年臣某等忝牧邑民阻趨庭賀

鳳歷頒春於天下化及華夷獸樽置酒於殿前樂聞忠
讜

中宮箋

四時成歲存逢泰道之亨萬物資生實仰坤儀之盛春
回寰宇歡謁掖廷敬惟位正禕衣功成元統風教天下
關雎正始之音朝夕宮中卷耳求賢之志履端有喜介
福宜多臣某等領邑羈縻望闕稱賀紫宸配德新年布
澤如春彤管流芳億壽與天同載

東宮箋

正月之吉始和輿情共悅維天之命不已嗣服益隆春
謁青宮祚延蒼籙敬惟長為主器允應貞符親傳精一
之心淵源聖學叅決萬機之政黼黻皇猷迎新茂對於
良辰端本繼承其大業臣某等叨居縣邑阻賀宮庭鳳
歷頌春大地之羣生有喜龍樓問寢齊天之洪福俱增

龜巢稿卷八